

四庫全書

子部

欽定四庫全書

子部

佛祖歷代通載卷十七

詳校官給事中臣鄧文泮

檢討臣何思鈞覆勘

總校官檢討臣何思鈞

校對官學正臣李巖

謄錄監生臣蔣繼勲

欽定四庫全書

佛祖歷代通載卷十七

元 釋念常 撰

唐

庚辰懿宗

宣宗長子好聲樂遊宴委政羣僚復迎佛骨而曰生見之死無恨年三十六崩葬簡

陵在位十四年改咸通

壬午杭州大慈山寰中禪師蒲坂人也姓盧氏頂骨圓

聳其聲如鐘出家於并州童子寺受心印於百丈禪師

結茅於南嶽一日南泉至問如何是庵中主師云蒼天

蒼天泉云蒼天且置如何是庵中主師云會即便會莫
忉忉泉拂袖而出趙州問般若以何為體師云般若以
何為體趙州大笑而出師明日見趙州掃地問般若以
何為體趙州置筵拊掌大笑師便歸方丈師後住浙江
大慈山上堂示衆云山僧不解答話只能識病又云說
得一丈不如行取一尺說得一尺不如行取一寸問道
者衆山素缺水師擬飛錫夜夢神人告之曰勿它之詰
朝見二虎以爪跑地泉自涌出味甘如飴有僧自岳至

乃曰童子泉涸矣移來在此故東坡題詩云亭亭石塔
東岡上此老初來百神仰虎移泉眼趑行脚龍作浪花
供撫掌至今遊人濯濯罷卧聽空堦環玦響故知此老
如此泉莫作人間去來想咸通三年二月十五日不疾
而逝壽八十三臘五十四僖宗諡性空大師定惠之塔
癸未制署法師知玄為悟達國師總教門事

乙酉朗州德山宣鑑禪師劍南人姓周氏博貫三藏嘗
講金剛經時以周金剛名之俄慨然曰窮諸玄辯若一

毫置於太虛竭世樞機似一滴投於巨浸學與無學吾知之矣乃盡棄其習謁龍潭信禪師問久嚮龍潭及到來潭又不見龍亦不現信曰子親到龍潭是夕師立侍更深信曰何不下去師曰暗信點紙燭與師師接得信即吹滅師豁然大悟曰今後更不疑天下老和尚舌頭也即日便辭信語其徒曰可中有箇漢牙如劍樹口似血盆一棒打不回頭他時向孤峯上立吾道去在師居澧陽垂三十年大中初武陵太守薛延望勅德山精舍

延請居之大闡宗風上堂示衆云於已無事則勿妄求
妄求而得亦非得也汝但無心於事無事於心則虛而
靈寂而妙若毛端許言之本末者皆為自欺毫釐繫念
三塗業因瞥爾情生萬劫羈鎖聖名凡號盡是虛聲殊
相劣形皆為幻色汝欲求之得無累乎及其厭之又成
大患終而無益僧問如何是菩提師打云出去莫向這
裏扃如何是佛師云佛是西天老比丘雪峯問從上宗
乘以何法示人師云我宗無語句亦無一法與人至是

將終謂衆曰捫空追響勞汝心神夢覺覺非竟有何事
言訖端坐而逝閱世八十有六臘六十有五時咸通六
年十二月三日也敕謚見性大師

具傳
燈

丙戌鎮州臨濟義玄禪師曹州南華人姓邢氏叅黃蘗
運禪師問如何是佛法的大意聲未絕運便打如是
三度致問三度被打遂辭下山運指往高安大愚處去
師至大愚問黃蘗近日有何言句師曰某甲三度問佛
法的大意三度被打不知有過無過愚云黃蘗恁麼

老婆心更問有過無過師於是大悟云元來黃蘗佛法無多子愚搗住曰尿床鬼子適來問有過無過而今却道黃蘗佛法無多子汝見箇甚麼師於大愚肋下築三拳愚托開云汝師黃蘗非干我事師由是再回黃蘗師資契會大機大用卓冠一時後還鄉徇趙人之請住于城南臨濟禪苑學徒奔湊師示衆曰赤肉團上有一無位真人常從女等諸人面門出入未證據者看時有僧問如何是無位真人師下禪床搗住云道道其僧擬議

師托開云無位真人是什麼乾屎橛師問樂普云從上
來一人行棒一人行唱阿那個親對曰搥不親師曰親
處作麼生普便唱師乃打師問木口和上如何是露地
白牛木口曰叫師曰啞木口曰老兄作麼生師曰遮畜
生大覺到參師舉拂子大覺敷坐具師擲下拂子大覺
收坐具入僧堂衆僧曰遮莫是和上親故不禮拜又不
喫棒師聞令喚新到僧大覺遂出師曰大衆道女未參
長老覺云不審便自歸衆麻谷到叅敷坐具問十二

面觀音阿那面正師下繩床一手收坐具一手搗麻谷
云十二面觀音向什麼處去也麻谷轉身擬坐繩床師
拈拄杖打麻谷接却相捉入方丈師上堂云大衆夫為
法者不避喪身失命我於黃蘗和上處三度喫棒如蒿
枝拂相似如今更思一頓喫誰為我下得手時有僧曰
某甲下得手和上合喫多少師與拄杖其僧擬接師便
打僧問如何是第一句師曰三要印開朱點窄未容擬
議主賓分曰如何是第二句師曰妙解豈容無著問漚

和爭負截流機曰如何是第三句師曰看取棚頭弄傀儡抽牽全藉裏頭人師又曰夫一句語須具三玄門一玄門須具三要有權有用汝等諸人作麼生會師唐咸通七年丙戌四月十日將示滅乃說傳法偈曰汭流不止問如何真照無邊說似他離相離名如不稟吹毛用了急須磨偈畢坐逝敕謚惠照大師塔曰澄靈

具如傳燈

戊子湖南長沙景岑禪師號招賢初住鹿苑其後居無定所但徇緣接物嘗示衆曰我若一向舉揚宗教法堂

裏須草深一丈我不得已向女諸人道盡十方世界是沙門眼盡十方世界是沙門全身盡十方世界是自己光明盡十方世界在自己光明裏盡十方世界無一人不是自己我常向女道三世諸佛共十方法界衆生是摩訶般若光光未發時女諸人向什麼處委光求發時尚無佛無衆生消息何處有山河國土來時有僧問如何是沙門眼師云長長出不得又云成佛成祖出不得六道輪回出不得僧云未審出箇什麼不得師云盡見

日夜見星僧云學人不會師乃云妙高山色青又青僧云如何是佛師云衆生色身是僧云河沙諸佛體皆同如何有種種名字師云從眼根返源名為文殊耳根返源名為觀音從心返源名為普賢文殊是佛妙觀察智觀音是佛無緣大悲普賢是佛無為妙行三聖是佛之妙用佛是三聖之真體用則有河沙假名體則總名一薄伽梵僧云色即是空空即是色此理如何師偈云碍處非牆壁通處勿虛空若人如是解心色本來同問如

何是佛性師偈云佛性堂堂顯現住相有情難見若悟
衆生無我我面何殊佛面問如何是上上人行履處師
云如死人眼問上上人相見時如何師云如死人手問
善財無量劫來為什麼游普賢身中世界不遍師云女
從無量劫來還曾遊得徧不問如何是普賢身師云舍
元殿裏更問長安問亡僧向什麼處去師有偈云不識
金剛體却喚作生緣十方真寂滅誰在復誰行師因臨
濟示衆赤肉團上有一無位真人乃有偈曰萬法一如

不用揀一如誰揀誰不揀即今生死本菩提三世如來同箇眼仰山問人人盡有這箇事只是用不得師云恰是請女用伸云作麼生用師乃踏倒仰山山曰直下似箇大虫世因名岑大虫

己丑洞山良价禪師示寂師會稽人姓俞氏幼出家年二十一往嵩嶽受具者謁南泉值馬祖忌日設齋泉問衆曰今日設齋未審馬祖還來否衆無對師乃出對曰待有伴即來泉聞之讚曰此子雖後生却堪雕琢師曰

和上莫壓良為賤次謁為山問曰頃聞忠國師有無情
說法良价未究其微為曰我這裏亦有只是難得其人
曰便請和上道為曰父母所生口終不敢道曰還有與
和上同時慕道者不為曰此去石室相連有雲巖道人
若能撥草瞻風必為子之所重師到雲巖問無情說法
什麼人得聞巖曰無情說法無情得聞曰和上還聞不
巖曰我若聞女即不得聞吾說法也曰若恁麼即良价
不聞和上說法巖曰我說女尚不聞何況無情說法耶

師乃述偈曰也大奇也大奇無情說法不思議若將耳
聽終難會眼處聞聲方始知遂辭雲巖問什麼處去曰
雖離和上未卜所止巖曰早晚却來曰待和上有住處
即來巖曰自此一去難得相見師曰難得不相見又問
巖曰和上百年後忽有人問還邈得師真如何祇對巖
曰但向伊道即這是師良久巖曰承當這箇事大須細
審師猶涉疑後因過水觀影大悟前旨因有偈曰切忌
從他覓迢迢與我疎我今獨自往處處得逢渠渠今正

是我我今不是渠應須恁麼會方得契如如大中末於
新豐山接誘學徒其後盛化於高安之洞山嘗因雲巖
忌日修齋僧問和上見南泉發跡為什麼與雲巖設齋
曰我不重先師道德亦不為佛法只重不為我說破又
僧問和上還肯先師也無曰半肯半不肯曰為什麼不
全肯曰若全肯即孤負先師也師謂衆曰知有佛向上
人方有語話分時有僧問如何是佛向上人師曰非常
師問僧世間何物最苦僧曰地獄最苦師曰不然在此

衣線下不明大事最苦師問僧名什麼曰某甲師曰阿
那箇是女主人公曰見祇對次師曰苦哉苦哉今時人
例皆如此只是認得驢前馬後將為自己佛法平沉此
之是也客中辯主尚未分明如何辯得主中主僧云如
何是主中主師云闇黎自道取曰某甲道得即是客中
主如何是主中主師曰恁麼道即易相續也大難師將
示寂謂衆曰吾有閒名在誰為吾除得衆皆無對有沙
彌曰請和上法號師曰吾閒名已謝問和上違和還有

不病者不曰有僧曰不病者還看和上不曰老僧看他
有分曰和上爭得看他師曰老僧看他時不見有病又
曰離此殼漏子向什麼處與吾相見衆無對遂剃髮披
衣令撞鐘湛然而寂時學徒千餘人號慟移時師忽開
眸曰夫出家人心不附物是真修行勞生息死於悲何
有乃召主事僧令辦愚癡齋一中蓋責其徒戀情也至
七日食具方備師隨衆齋畢復謂衆曰僧家無事大率
臨行之際勿須誼動明日浴罷端坐長往壽六十三臘

四十二謚悟本禪師塔曰寂覺

是歲五月帝幸安國寺賜國師知玄寶座高二丈材用沉香塗髹縷龍鳳葩為金鈿之上施復座陳經几其前四隅立瑞鳥神人高數尺磴道以陞前被綉囊錦襜珍麗絕甚時宮中日齋萬僧帝自為贊唄宰相蕭倣諫以為天竺法割愛取滅非帝王躬踐今筆梵言口梵音不若徵謬賞濫罰振殃祈福况佛者可以悟取不可以相求懿宗雖不納然嘉美其言玄姓陳氏世號陳菩薩三

學洞貫名蓋一時異跡尤多及僖宗避巢賊幸成都遣御史郭遵賁璽書徵赴行在帝素重其名引對大悅賜號悟達國師留行宮久之辭歸九隴忽定中見菩薩降其室摩玄頂演深妙音而慰安之言訖即隱俄一珠入玄左股隆起楚甚上有晁錯二字玄知夙債也即右脇安卧而逝著述凡二十餘萬言行於世弟子僧徹徹弟子覺暉俱有重名三世為僧統或謂玄前身蓋漢川三學山知鉉法師鉉在世嘗講十地品感地變金色及終

感病與玄絕類

庚寅咸通十一年相國裴休薨休字公美益州人兒時與兄弟偕隱晝講經夜著書終年不出戶有饋鹿者諸生薦之休不食曰蔬食猶不足今一啗肉後何以繼擢進士第累更內任嘗出刺洪州一日入龍興寺觀壁畫歎曰容儀可觀高僧何在時有數僧對不愜休曰此間莫有禪者麼僧云近一僧至似禪者休命名乃黃蘗運禪師時未顯名休以前問扣之運高聲曰裴休休應諾

運曰在什麼處休豁然從此契入遂迎入府第旦夕問
法及移鎮宛陵亦命與俱由是深徹法源復與圭峯密
禪師道緣尤密大中時執政六年次歷諸鎮節度薨年
七十有四休能文章書楷道媚有體法為人醞藉操守
嚴正進止雍閑宣宗嘗曰休真儒者居常不御酒肉著
釋氏文數萬言其圭峯禪源諸註序曰禪師集禪源諸
詮為禪藏而都序之休曰未嘗有也自如來現世隨機
立教菩薩間生隨病指藥故一代時教開深淺之三門

一真如心演性相之別法馬龍二士皆弘調御之說而
空性異宗能秀二師俱傳達摩之心而頓漸殊稟天台
專依三觀牛頭無有一法江西舉體全真荷澤直指知
見其他空有相破真妄相攻反奪順取密指顯說故西
域中夏其宗實繁良以病有千源藥生多品投機隨器
不得一同雖俱為證悟之門盡是正真之道然諸宗門
下通少局多故數十年來師法益壞以承稟為門戶各
自開張以經論為戈矛互相攻擊情隨函矢而遷變法

逐人我以高低是非紛拏莫能辨析則向者世尊菩薩
諸方教宗適足以起諍後人增煩惱病何利益之有哉
圭峯禪師久而歎曰予丁此時不可默矣於是如來
三種教義印禪宗三種法門融瓶槃釵釧為一金攪酥
酪醍醐為一味振綱領而舉者皆順據會要而來者同
趨尚恐學者之難明也又復直示宗源之本末真妄之
和合空性之隱顯法義之差殊頓漸之同異遮表之回
互權實之淺深通局之是非莫不提耳而告之指掌而

示之嘖呻以吼之柔和以誘之乳而藥之恐性命之夭
殤也保而護之念水火之漂焚也揮而散之悲鬪諍之
牢固也大明不能破長夜之昏慈父不能保身後之子
若吾師者捧佛日而委曲回照疑瞋盡除順佛心而橫
亘大悲窮劫蒙益是則世尊為闡教之主吾師為會教
之人本末相符遠近相照可謂畢一代時教之能事矣
或曰自如來滅後未嘗大都而通之今一旦違宗趣而
不守廢關防而不據無乃乖秘藏密契之道乎答曰佛

於法華經涅槃會上亦以融為一味但昧者不覺故涅槃經云迦葉菩薩曰諸佛有露語而無密藏世尊讚歎曰如來之言開發顯露清淨無翳愚人不解謂之秘藏智者了達則不名藏此其證也故王道興則外戶不閉而守在夷狄佛道備則諸法總持而防在外魔不當復執情攘臂於其間也嗚呼後學當取信於佛無取信於人當取證於本法無取證於末習能如是則可以報圭峯之劬勞德矣

癸巳咸通十四年三月庚午詔兩街僧於鳳翔法門寺迎佛骨於是以金銀為剎珠玉為帳孔鵠周飾之小者尋丈高者倍之刻檀為簷柱陛城塗黃金每一剎數百人舉之香輿前後係道綴玉瑟瑟幡蓋珠綵以為幢旌費不資限以四月八日至京師綵觀夾道天子御安福門樓迎拜引入內道場三日後出京城諸寺詔賜兩街僧金帛京師耆老及見元和事者悉厚賜所過鄉聚皆裹土為剎相望於途光景盡見京城高資相與集大衢

作僧臺縵闕注水銀為池金玉為樹集桑門羅像設考
鼓鳴螺繼日夜下詔曰朕以寡德纘承洪業十有四年
頃值寇興王師未息朕憂勤在位愛育生靈遂尊崇釋
教至重玄門迎請真身為百姓祈福今觀覩之衆隘塞
路岐載念狴牢寢興在慮嗟我黎人陷于刑辟况漸當
暑毒繫於縲紲京畿及天下諸州府見禁囚遞減死一
等明年四月詔送佛骨歸于鳳翔都人耆耄辭餞皆鳴
咽流涕

新史贊曰人之惑怪神也甚哉若佛者特西域一槁人耳裸頂露足以乞食自資癯辱其身屏營山樊行一槩之苦本無求於人徒屬稍稍從之然其言荒茫漫靡夷幻變現善推不驗無實之事以鬼神死生貫為一條據之不疑培嗜欲棄親屬大抵與黃老相出入至漢十四葉書入中國蹟夫生人之情以耳目不際為奇以不可知為神以物理之外為畏以變化無方為聖以生而死死而復生回復償報歆艷其間為或然以賤近貴遠為

喜鞮譯差舛不可研詰華人之謫誕者又攘莊周列禦
寇之說佐其高層累架騰直出其表以無上不可加為
勝妄相夸脇而唱其風於是自天子逮庶人皆震動而
奉祀之初宰相王縉以緣業事佐代宗始作內道場晝
夜梵唄冀禳寇戎大作孟蘭肖祖宗像分供寺塔為賤
臣嘻笑至憲宗遂迎佛骨於鳳翔內之宮中韓愈指言
其弊帝怒竄愈瀕死憲亦弗克天年幸福而禍無乃左
乎懿宗不君精爽奪迷復蹈前車而覆之興衰無知之

場丐庇百解之哉以死自誓無有顧藉流涕拜伏雖事
宗廟上帝無以進焉屈萬乘之貴自等於古胡數千載
而遠以身為殉嗚呼運彥祚殫天告之矣懿不三月而
殂唐德之不競厥有來哉

論曰甚矣宋景文公詆毀吾先師之厚也屢欲直其
辭而為之解嘲及得大顛對退之之論李節贈疏言
之叙凡予所欲言者彼既言矣故不別論且憲懿二
宗誠為崇奉太過至於高祖沙汰三教詔下而位移

武宗大減釋氏未逾歲而被禍此亦不得不懼也雖然真佛也者聖凡之大本也體與太虛等徧用與衆庶同功無為而無所不為無在而無所不在然則心外見佛而過奉之者非正見也昧乎大本而故毀之者即自毀也景文斥其奉之之弊而匿其毀之之失豈良史之謂哉

甲午僖宗儼

懿第五子十一即位年二十七崩葬靖陵

改乾符

是歲并州民生子二

頭四

漢賊王仙芝聚衆於長垣

乙未

高駢破
南詔

王仙芝作亂
黃巢應之

己亥是歲十一月兩日並出而鬪

庚子改廣明

田令孜奉
天子西走

巢賊入長安國號
大齊建元金統

李克
用奔

達
罕

辛丑改中和

上自興
元入蜀

拓跋思恭以兵赴難以之權夏

綏節度使

澧州夾山善會禪師廣州峴亭人也姓廖氏九歲於潭
州龍牙山出家依年受戒往江陵聽習經論該練三學

遂參禪會勵力參承初住京口一夕道悟策杖而至遇
師上堂僧問如何是法身師曰法身無相曰如何是法
眼師曰法眼無瑕師又曰目前無法意在目前不是目
前法非耳目所到道悟乃笑師乃生疑問悟何笑悟曰
和上一等出世未有師可往浙中華亭縣參舩子和上
去師曰訪得獲否道悟曰彼師上無片瓦遮頭下無卓
錫之地師遂易服直詣華亭會舩子鼓櫂而至師資道
契微朕不留

語見舩
子章

師比欲遁世忘機尋以學者交湊

廬室星布曉夕參依唐咸通十一年庚寅海衆卜于夾
山遽成院宇師上堂示衆曰夫有祖以來時人錯會相
承至今以佛祖句為人師範如此却成狂人無智人去
他只指示汝無法本是道道無一法無佛可成無道可
得無法可捨故云目前無法意在目前他不是目前法
若向佛祖邊學此人未有眼目皆屬所依之法不得自
在本只為生死茫茫識性無自由分千里萬里求善知
識須有正眼永脫虛謬之見定取目前生死為復實有

為復實無若有人定得許女出頭上根之人言下明道
中下根器波波浪走何不向生死中定當取何處更疑
佛疑祖替汝生死有智人笑女偈曰勞持生死法唯向
佛邊求目前迷正理撥火覓浮漚僧問從上立祖意教
意和上此間為什麼言無師曰三年不食飯目前無飢
人曰既無飢人某甲為什麼不悟師曰只為悟迷却闍
黎師說頌曰明明無悟法悟法却迷人長舒兩脚睡無
偽亦無真僧問如何是夾山境師曰猿抱子歸青嶂裏

烏銜花落碧巖前師再闢玄樞迨于一紀唐中和元年
辛丑十一月七日召主事曰吾與衆僧話道累歲佛法
深旨各應自知吾今幻質時盡即去女等善保護如吾
在日勿得雷同世人輒生惆悵言訖至于夜奄然而逝
其月二十九日塔于本山壽七十七臘五十七敕謚傳
明大師塔曰永濟

壬寅

八月巢所署同州防禦
使朱溫來降賜名全忠

癸卯

四月李克用等與巢戰
于渭橋敗之復京都

甲辰

七月李師悅追黃巢於狼
虎谷其甥林言斬巢首降

乙巳光啟三月帝歸于京師

十二月中官田令孜討
王重榮敗績帝奔于鳳

朔沙陀之兵入于京師剽掠焚蕩
遂為丘墟焉自是天下崩裂大亂

丁未是歲巖頭谿禪師示寂師泉州人姓柯氏少落髮
抵長安受具游講席習經律次與雪峯欽山結伴優游
禪苑初造臨濟值濟遷化見仰山才入門提起坐具云
和上仰山擬取拂子舉之師曰不妨好手次見德山執
坐具上法堂瞻視山曰作什麼師咄之山曰老僧罪過

在什麼處師曰兩重公案便下參堂山曰這箇阿師稍似个行脚人至來日上問訊山曰闍黎什麼處學得這个虛頭來師曰全豁終不自謾山曰向後不得辜負老僧雪峯在德山作飯頭一日飯遲德山托鉢至法堂上峯曬飯巾次見德山云這老漢鐘未鳴鼓未響托鉢向什麼處去德山便歸方丈峯舉似師師云大小德山不會末後句山聞差侍者喚師至方丈問汝不肯老僧那師密啟其意德山至來日上堂與尋常不同師到僧堂

前撫掌大笑云且喜得老漢會末後句他後天下人不
奈何雖然如此也只得三年德山果三年後遷化問古
帆未掛時如何答後園驢喫草上堂謂衆曰吾嘗究涅槃
經見三段文似衲僧說話又曰休休有僧禮拜請益
師曰經云吾教意如伊字三點第一向東方下一點點
開諸菩薩眼第二向西方下一點點諸菩薩命根第三
向上方下一點點諸菩薩頂此是第一段義又曰吾教
意如摩醯首羅劈開面門豎亞一隻眼此是第二段義

又曰吾教意猶塗毒鼓擊一聲遠近聞者皆喪是第三
段義時小巖上座問如何是塗毒鼓師以兩手按膝亞
身曰韓信臨朝底問浩浩塵中如何辦主師曰銅沙鑼
裏滿盛油問如何是道師曰破草鞋拋向湖裏著或問
佛問法問道問禪者師皆作噓聲嘗謂衆曰老漢去時
大吼一聲了去其後中原盜起衆皆辟地師端居自如
一日賊大至責以無供餽遂刺刃焉師神色不動大叫
一聲而終壽六十有一後唐追謚清嚴大師有嗣法羅

山能世其高風云

戊申改文德三月帝崩

己酉昭宗晏

懿第七子為君俊穎有興復志而外患已成內無賢佐雖有智勇而不能為年三十

八為朱全忠等弑于御懷葬和陵在位十六年

改龍紀

庚戌改大順

是時隨所在十三節度使霸據一方立國改元

具詳雷氏說

西秦茂貞

茂貞號秦鳳翔三七

吳行密

揚吳淮南四主四六

吳越鏐

錢杭吳越五主八四

燕守光

守光僭燕一十九年

楚殷

馬楚湖南五主五七

蜀建

王建前蜀二主三五

荆季興

季興荆南五主五七

閩審知

王閩福建五主五五

南漢隱

南漢隱廣五主六七

蜀知祥

知祥後蜀二主四一

南廣昇

李唐江南三主三九

殷延改

延改號殷建州三年

東漢旻

東漢崇源四主二八

西秦茂貞

字正臣本姓宗名文通深州博野人祖鐸父端皆隸博野軍為小校廣明中破

巢功大僖幸興元賜姓李氏名茂貞明年天子歸宮封鳳翔節度進封隴西郡王自此蠶食河

西有山南十四州地據鳳翔
二十七年同光二年卒矣

是年仰山惠寂禪師示寂韶州懷化人也姓葉氏年十

五欲出家父母不許後二載師斷手二指跪致父母前
誓求正法以答劬勞遂依南華寺通禪師落髮未登具
即遊方初謁耽源已悟玄旨後叅為山遂升堂與祐問
曰女是有主沙彌無主沙彌曰有主曰在什麼處師從
西過東立為知是異人便垂開示師問如何是真佛住
處為曰以思無思之妙返思靈燄之無窮思盡還源性
相常住事理不二真佛如如師於言下頓悟自此執侍
十有五載凡有言句皆為後世宗範一日師問為山曰

和上浮漚識近來寧未為山云我無來經五年也仰曰
若恁麼和上如今身前應普超三昧頂為山云未在仰
曰性地浮漚尚寧然燈身前何故未為山云理則如是
我未敢保任仰曰如何是未敢保任處為山云女莫口
解脫女豈不聞安秀二師被則天試入水始知有長人
到這裏鐵佛也須汗出寂子女大須修行莫終日口密
及領衆住王莽山一日禪床陷入地中地神告以此山
不任和上居止東南有大仰山乃人間福地遂遷止仰

山示衆曰女等諸人各自回光返照莫記吾言女無始
劫來背明投暗妄想根深卒難頓拔所以假設方便奪
女粗識如將黃葉止啼有什麼是處亦如人將百種貨
物與金寶作一鋪貨賣祇擬輕重來機所以道石頭是
真金鋪我這裏是雜貨鋪有人來覓鼠糞我亦拈與他
來覓真金我亦拈與他時有僧問鼠糞即不要請和上
真金師云齧齧擬開口驢年亦未曾師云索喚則有交
易不索喚則無我若說禪宗身邊要一人相伴亦無豈

况五百七百萬耶我若東說西說則爭頭向前採拾如
將空拳誑小兒都無實處我今分明向女說聖邊事且
莫將心湊泊但向己性海如寶而修不要三明六通何
以故此是聖末邊事如今且要識心達本但得其本不
愁其末他時後日自具去在若未得本縱饒將情學他
亦不得豈不見為山和上道凡聖情盡體露真常事理
不二即如如佛師因歸為山省覲祐問子既稱善知識
爭辨得諸方來者知有不知有有師承無師承是義學

是玄學子試說看師曰惠寂有驗處但見諸方僧來便
豎起拂子問伊諸方還說這箇不說又曰這箇且置諸
方老宿意作麼生祐歎曰此是從上宗門爪牙祐問大
地衆生業識茫茫無本可據子作麼生知他有之與無
師曰惠寂有驗處時有一僧從面前過師召云闍黎僧
回首師曰和上這箇便是業識茫茫無本可據祐曰此
是師子一滴乳能散六斛驢乳鄭愚相公問不斷煩惱
而入涅槃時如何師豎起拂子公云入之一字不要亦

得師云入之一字不為相公師問雙峰師弟近日見處如何對曰據某甲見處實無一法可當情師曰汝解猶在境雙峰曰某甲只如此師兄如何師曰汝豈無能知無一法當情者為山間云寂子一句疑殺天下人僧問禪宗頓悟畢竟入門的意如何師曰此意極難若是祖宗門下上根上智一聞千悟得大總持此根人難得其有根微智劣所以古德道若不安禪靜慮到這裏總須茫然僧曰除此格外還別有方便令學人得入也無師

曰別有別無令汝心不安汝是什麼處人曰幽州人曰
女還思彼處不曰常思師曰彼處樓臺林苑人馬駢闐
女反思思底還有許多般也無曰某甲到這裏一切不
見有師曰女解猶在境信位即是人位即未是據女所
解只得一玄得坐披衣向後自看為山一日復問師曰
女向後記得人不師曰若記只記見解為曰何以如此
師曰西竺般若多羅識二千年事至時毫髮不移曹溪
亦識身後有難及至亦無爽今時還得不為曰此是行

通我是自宗通亦是學禪未問六通師曰某謂見解宗
通語絕滲漏屬語密行解照用自辨清濁業屬意密某
未齊曹溪與般若多羅不敢輒記為山深然之先是師
預示偈曰吾年七十七老去是今日任性自浮沉兩手
攀膝屈至是兩手抱膝而逝師之異迹及垂識記具存
本山實錄

壬子改景福

甲寅改乾寧

丁巳

吳行密字化源姓楊氏廬州合肥人家世微賤有膂力能舉千斤日行三百里為本州步健破巢功大昭宗封淮南王進封楚王梁祖封吳王卒是年始封至梁祖二年據廬州十二年壽五十四子渥據淮南

乾寧四年趙州從諗禪師示寂閱歲一百二十師曹州人姓郝氏落髮未具戒便造南泉泉一見深器之一日問如何是道泉云平常心是道師曰還可趣向不曰擬

向即垂師曰不擬如何知是道泉云道不屬知不屬不知知是妄覺不知是無記若真達不疑之地猶如太虛廓然虛豁豈可強是非耶師於言下大悟自是周旋南泉之門凡二十年次遍歷諸方後歸北地衆請住趙州觀音古刹示衆曰如明珠在掌胡來胡現漢來漢現老僧有時將一枝草作丈六金身用有時把丈六金身作一枝草用佛是煩惱煩惱是佛問曰未審佛是誰家煩惱師云與一切人煩惱僧云如何免得師云用免作麼問師還

入地獄不答云老僧未上入僧云大善知識為什麼却
入地獄師云若不入阿誰教化女真定帥王公携諸子
入院師坐而問曰大王會麼王云不會師云自小持齋
今已老見人無力下禪床王公加禮而去一日示衆曰
金佛不度爐木佛不度火泥佛不度水真佛屋裏坐菩
提涅槃真如佛性盡是貼體衣服亦名煩惱不問即無
煩惱且實際理地什麼處著得一心不生萬法無咎女
但究理坐看三二十年若不會道截取老僧頭去夢幻

空花何勞把捉心若無異萬境一如既不從外得更拘
執作什麼如羊相似拾物安向口裏老僧見樂山和上
道有人問著便交合取狗口老僧亦交合却口師之玄
言天下推為宗門妙唱云

戊午改光化

聖胄集成

華嚴玄偉禪師編次貞元
已來宗師機緣行于世

庚申上與崔肩謀誅宦官

劉季述等以禁軍劫天子幽
於少陽院矯詔立太子即帝

位

辛酉改天復

韓全誨等劫帝幸鳳翔
是年進錢鏐爵越王

雲居道膺禪師示寂師幽州玉田人參洞山价公契悟
宗旨价深可之曰此子已後千萬人把不住一日問曰
昔南泉問講彌勒下生經僧云彌勒什麼時下生僧曰
見在天宮當來下生南泉云天上無彌勒地下無彌勒
師問只如天上無彌勒地下無彌勒未審誰與安名洞
山直得禪床震動乃曰膺闍黎及結庵于後洞日感天
廚奉供洞山勉令隨方接人遂登雲居學徒奔湊至一
千五百衆嘗示衆曰古人云地獄未是苦若向此衣單

下不明大事却是最苦女等既在這箇行流十分去九
不較多也更著些子精彩便是上座不屈平生行脚不
辜負叢林古人道欲得保任此事須向高高峯頂立深
深海底行方有些子氣力汝若大事未辦須履踐玄途
又曰汝等師僧家發言吐氣須有來由凡問事須識好
惡尊卑良賤信口無益傍家到處覓相似語言所以尋
常向兄弟道莫怪不相似恐同學太多去第一莫將來
不相似八十老人出場屋不是小兒戲一言參差千里

萬里難為收攝直至敲骨打髓須有來由言語如鉗夾
鈎鎖相續不斷始得頭頭上具物物上新可不是精得
妙底事道女知有的人終不取次十度擬發言九度却
休去為什麼如此恐怕無利益體得的人心如牆月扇
口邊直得醖出不是汝強為任運如此欲得恁麼事須
是恁麼人既是恁麼人何愁恁麼事學佛邊事是錯用
心假饒解得千經萬論講得天華落石點頭亦不干自
己事況乎其餘有何用處若將有限心識作無限中用

如將方木逗圓孔多少差訛設使攢花簇錦事事及得
盡一切事亦只喚作了事人無過人終不喚作尊貴將
知尊貴邊著得什麼物不見從門入者非寶棒上不成
龍知麼又曰如好獵狗只解尋有踪跡底忽遇羚羊掛
角莫道跡氣亦不識僧問羚羊掛角時如何師曰六六
三十六曰不會師云不見道無蹤跡一僧在房內看經
師隔窻問閣黎念者是什麼經對曰維摩經曰不問維
摩經念者是什麼經其僧有省師臨終前期五日為衆

開最後方便序出世始末衆皆愴然至時端坐而化後

唐諡曰弘覺禪師

甲子改天祐

正月朱全忠奉天子遷洛陽八月試之而立少子祝年十二

乙丑哀帝祝天祐二年

諱竟天昭第九子朱全忠弒昭立帝時年十三軍國之

政稟全忠年十七歲梁王使劉霸害馬葬溫陵謚景宗在位三年

丙寅濮王糾

昭之子少帝遇鴆暴崩梁王與百僚號慟衆議即位如周公故事天祐四年禪位于

梁遇鴆而卒

右唐十九帝

不與武后

凡二百九十年

而朱溫篡之

五代

叙曰後梁朱氏篡唐閱五朝八姓十有三君五十三載
歐陽文忠公法春秋著為五代史古所謂春秋作而亂
臣賊子懼然自秦漢而下禍起蕭牆變生肘腋君臣父
子之際所不忍願聞者奚更不懼之多乎予嘗以唐新
舊本紀叅校粗見文忠師仰春秋畧例紀事褒貶之妙
非他史所及因采數十端著新唐史本紀畧例一篇及
得五代史閱其自發述作之意與予言亦頗合然舉春

秋宗王之作裁正唐史可也以之致虛名盛禮而歆艷
五代之君不幾於枉設乎朱全忠弑昭宗滅唐祚雖王
莽劉曜之惡不足以比之及其有國父父子子更相屠
僇不殊犬豕之死正吾教善惡因果之效也文忠蔑視
而不取特假春秋義魏位號朝儀以資之卒無一辭深
誅痛責使後世忠良閱之曷以泄胷中之不平乎荆國
王文公嘗歎惜文忠不修晉書而修五代史予之言蓋
文公歎惜之意也至於李克用石敬瑭劉知遠皆突厥

沙陀夷狄之種朱全忠郭威乃中國人反不若三夷狄
近人類也郭威代漢及養子世宗頗有聲然議者概見
而未知詳夫

丁卯梁太祖溫改開平 僖宗賜姓全忠禪唐之後更

名晃字匡聖本宋州碭山午溝里人父曰誠以五經
教之果篡唐祚年六十一為子友珪弑矣在位六年

都汴遷洛

雷氏曰梁祖朱溫庶
人末帝三主十七

吳越鏐

字具美姓錢氏杭州臨安人少無賴鬪散
僖宗時為董昌偏將以弩射死黃巢先鋒

斬首數百巢不敢犯臨安昌以為都指揮昌亦
叛鏐以狀聞昭宗詔以鏐為浙東招討使既下
昌進封天下兵馬都元帥至梁進封吳越王後
唐莊入洛賜玉冊金印因稱吳越王壽八十一
立杭州二十一年雷氏
曰錢杭吳越五主八四

燕守光

姓劉氏深州樂壽人父仁恭事幽州李可
舉有大勳烈光亦如之八月自號大燕皇

帝改元應天立幽州十九年
雷氏曰守光僭燕一十九年

戊辰五月雪峯義存禪師示寂師泉州人姓曾氏十七

落髮住幽州受具綿歷禪會緣契德山咸通中登象骨

山雪峯剎院玄侶奔萃懿宗賜號真覺大師上堂僧問

拈槌豎拂不當宗乘和尚如何指示師豎起拂子其僧
抱頭而出師乃不顧道恁問只如古德豈不是以心傳
心師曰兼不立文字語句恁曰只如不立文字語句師
如何傳師良久恁禮拜師曰更問我一轉豈不好恁曰
就和上請一轉話頭師曰只恁麼唯別有商量曰和上
恁麼即得長慶問從上諸聖傳受一路請師垂示師默
然長慶禮拜而退師莞爾而笑師有時謂衆曰堂堂密
密地道恁出問曰是什麼堂堂密密師起立曰道什麼

愆退步而立師垂語曰此事得恁麼尊貴得恁麼綿密
愆對曰某甲到來數年不聞和上恁麼示誨師曰我向
前雖無如今已有莫有妨麼曰不敢如此和上不已而
已師曰致使我如此愆從此信入因普請次師舉為山
見色便見心語問愆還有過也無愆曰古人為什麼事
師曰雖然如此要共女商量曰恁麼即不如道恁鋤地
去又嘗普請次師問皎然曰古人道誰知席帽下元是
昔愁人古人意作麼生皎然側戴笠子曰這箇是什麼

人語又問曰持經者能荷擔如來然乃捧師向禪床上著一日紹卿隨師經行次見芋葉動師指動葉示之卿曰某甲怕怖師曰是汝屋裏底怕怖什麼紹卿從此開悟安國引瑫叅師師曰甚處來曰江西師曰什麼處見達磨曰分明向和上道師曰道什麼瑫曰什麼處去來一日師見瑫忽搗住云盡大地是解脫門把手教伊入不肯入曰和上恠引瑫不得師曰雖然如此爭柰背後許多師僧何太原孚上座叅師禮拜訖立於座右師才

顧視孚便下看主事異日師見孚指日示之孚搖手而出師曰汝不肯我孚曰和上搖頭某甲擺尾什麼處不肯和上師曰到處也須諱却一日衆僧晚叅師在中庭卧孚曰五州管內只有這和上較些子師便起去師居閩川四十餘年法席之盛卓冠天下常不下一千五百衆臨終出遊藍田莫歸浴畢中夜示寂壽八十有七

十一月玄沙師備禪師示寂師少為漁家子年甫三十始出家具戒習頭陀行與雪峯師資道契雪峯每歎曰

備頭陀再來人也閱楞嚴經發明心地由是應機敏捷
與修多羅冥契諸方玄學者所未決必從之請益師
上堂時久衆謂不說法一時各歸師乃呵之曰看揔是
一樣底無一箇有智惠但見我開兩片皮盡來簇著覓
言語意度是我真實為他却揔不知看恁麼大難大難
十方諸佛把女向頂上著不敢錯悞著一分子只道此
事唯我能知會麼如今相紹繼盡道承釋迦我道釋迦
與我同叅汝道叅阿誰會麼汝今欲得出他五蘊身田

主宰但識取汝秘密金剛體古人向汝道圓成正徧周
沙界我今少分為汝智者可以譬喻得解汝見此閻浮
提日麼世間人所作興營養身活命種種作業莫非承
他日光成立只如日體還有多般及心行麼還有不周
遍處麼欲識此金剛體亦如是只如今山河大地十方
國土色空明暗及汝身心莫非盡承汝圓成威光所現
直是天人羣生類所作業次受生果報有性無情莫非
承女威光乃至諸佛成道果接物利生莫非盡承女威

光只如金剛體還有凡夫諸佛麼有女心行麼不可道
無便當去女既有如是奇特會麼努力珍重師初住梅
溪後居玄沙一時天下鼓林海衆皆望風欽服閩帥王
公待以師禮學徒垂千人室戶不閉師應機接物垂二
十年所演法要有大錄行于世沒年七十有五閩帥賜
號宗一禪師

楚殷

字霸圖姓馬氏許州鄢陵人世為農家事梁
征伐有功封為楚王至末帝貞明丙子始建

國立郡州十四年壽七十九
雷氏曰馬楚湖南五主五七

蜀建

字光圖姓王氏許州武陽人佐唐有功封西平王進封蜀王遂有鼎分之志昭宗遇弒少

帝禪梁舉哭哀慟文武勸進遂立成都號蜀十
二年卒壽七十二改武成雷氏曰王建前蜀

二主
三王

荆季興

字貽孫陝州硤石人本名季昌少為汴州李讓家童梁祖初鎮宣武讓入貲養為子

易姓朱氏興因讓故得見梁祖祖見奇之亦命
為子因姓朱氏後拜宋州刺史破青州徙潁陽
防禦進封渤海王復姓高氏唐莊開蜀有功封
南平王吳人冊之立荆南二十年壽五十四

雷氏曰季興荆
南五主五七

吳渥

字承天密長子密病出鎮宣州嗣立淮南一
年壽二十三為溫顯殺之隆演字鴻源密

次子溫顥殺渥演遂即位十二年
改年武元壽二十四卒弟溥又立

閩審

知字信通姓王氏光州固始人兄潮唐封福
州觀察既卒知代征伐有功昭宗進封瑯

琊王至梁祖加拜為中書令封閩王遂立福建
五十八年壽六十四雷氏曰王閩福建五主五

庚午南嶽山惟勁頭陀集光化以來出世宗師機緣為

續寶林傳

辛未改乾化

南漢隱

姓劉氏上蔡人也其祖安仁後
徙閩中商賈南海因家焉父謙

為廣州牙將破巢為封州刺史既卒州人表隱代之
事唐勳烈昭宗封為南海王天祐二年進封安南都

諡三年封南平王今梁又封南海王後貞明三年卒壽三十八

雷氏曰南海隱廣五主六七

壬申梁祖疾甚郢王友珪左遷萊州刺史不行乃微行
詣左龍虎統軍韓勅謀入伏禁中友珪僕夫馮廷錡
刺帝于寢殿矯詔友珪權主軍國之務發喪即帝位
初梁祖溫畧地於宋亳間偶與逆旅婦人野合而生
立未一年友貞貶為庶人改年元鳳

癸酉末帝友貞一名瑱溫第三子聞友珪亂命袁象先等討
之象先等殺友珪命趙崑持傳國寶至汴迎王即位更名

鎰都汴蓋祖地也後使皇甫麟弑之在位十年復稱乾化

乙亥改貞明

丙子晉兵七萬來伐遼主安巴堅稱帝立國號大契

丹改元天贊遼之始也

中國簡冊所不載遼夷草昧無可考故其年代不可得而

詳也其父幹里為夷離中猶中國刺史主生而拓落多智雄健有膽畧好騎射鐵厚一寸而洞之夜寢則有光左右莫不驚諸部畏服之有宋相安至天祚為金滅之治國十一年

明州奉化縣布袋和尚者未詳氏族自稱名契此形裁
猥媿額顴腹出語無定寢卧隨處常以杖荷一布囊

凡供身之具盡貯囊中入鄧肆聚落見物則乞或醢醢
魚菹才接入口分少許投囊中時號長汀子布袋師也
嘗雪中卧雪不沾身人以此奇之或就人乞其貨則售
示人吉凶必應期無忒天將雨即著濕草屨途中驟行
遇亢陽即曳高齒木履市橋上豎膝而眠居民以此驗
知有一僧在師前行師乃拊僧背一下僧迴頭師曰乞
我一文錢曰道得即與女一文師放下布袋叉手而立
白鹿和上問如何是布袋師便放下布袋又問如何是

布袋下事師負之而去先保福和上問如何是佛法大意師放下布袋叉手保福曰為只如此為更有向上事師負之而去師在街衢立有僧問和上在遮裏作什麼師曰等箇人曰來也來也

歸宗柔和尚上別云歸去來

師曰女不是遮

个人曰如何是遮个人師曰乞我一文錢師有歌曰只个心心心是佛十方世界最靈物縱橫妙用可憐生一切不如心真實騰騰自在無所為閑閑究竟出家兒若覩目前真大道不見纖毫也大奇萬法何殊心何異何

勞更用尋經義心王本自絕多知智者只明無學地非
聖非凡復若乎不彊分別聖情孤無價心珠本圓淨凡
是異相妄空呼人能弘道道分明無量清高稱道情携
錫若登故國路莫愁諸處不聞聲又有偈曰一鉢千家
飯孤身萬里遊觀人青目少問路白雲頭梁貞明二年
丙子三月師將示滅於嶽林寺東廊下端坐磐石而說
偈曰彌勒真彌勒分身千百億時時示時人時人自不
識偈畢安然而化其後他州有人見師亦負布袋而行

於是四衆競圖其像今嶽林寺大殿東堂全身見存

丁丑

漢龔

初名嵩隱之庶子生于外舍身長七尺承父襲封南海王是年建國號越二年

更號漢壽五十四卒立三十一
龔者蓋採周易飛龍在天之義爾

戊寅

蜀衍

字化源建之第十一子母曰徐賢妃以寵得立為太子建亡即位荒淫自恣委

政宦者改大光立六年唐郭崇韜伐之

庚辰

吳溥

密第四子立不改號治十七年壽二十八南唐昇滅之

辛巳改龍德

癸未上聞李嗣源兵至今皇甫麟殺已嗣源兵入城國

亡

右朱梁二主共一十七年

晉李存勗滅之

後唐

姓李氏王土德都汴洛起太原○雷氏曰唐武克用莊明閔末四主十五

武皇帝克用

世號朱耶出于突厥後自號沙陀以朱耶為姓烈考朱耶赤心以徐州功大懿宗賜

姓李氏俾定天下莊宗即位天祐五年薨葬陵鴈門界

莊宗存勗

太祖嫡子母曹后帝英武善戰滅梁代之自梁祖二年立至同光三年四十三歲崩葬河

南雍陵 改同光

甲申 朝廷封李茂貞為秦王○高季興為南平王

魏府興化存獎禪師詔入內庭帝問禪要御賜馬一疋
不慣墜馬傷足至次年示疾帝一日謂師曰朕收大梁
得一顆無價明珠未有人酬價師曰請陛下珠看帝以
手展開幙頭脚師曰君王之寶誰敢酬價師化後勅諡
廣濟大師塔曰通濟師嘗問僧什麼處來曰崔禪處來
師曰將得崔禪唱來否曰不將得來師曰恁麼即不從
崔禪來僧便唱師遂打師示衆曰我只聞長廊下也唱
後架裏也唱諸子女莫盲唱亂唱直饒唱得興化向半

天裏住却撲下來氣欲絕待興化蘇息起來向女道未
在何故我未曾向紫羅帳裏撒真珠與女諸人虛空裏
亂唱作什麼師勘克賓語具傳燈

乙酉朝廷遣周德威執劉守光至鴈門令存霸刺心血祭祖已斬之于市

吳溥

於石頭城上建清涼寺請悟空住持

前蜀

改咸康來降勅益知祥鎮蜀前蜀二主共三十五年

錢鏐封吳越國王

仍請署羣臣百官詔許之

閩延翰

字子逸，審知長子。同光四年，莊宗遇弒，建國稱王。梁唐正朔立一年。

丙戌改天成，明宗嗣源立。

世本夷狄，無姓。父電為鴈門步將，生子邈，倭烈太祖克用。

養為子，姓李，名嗣源。初，帝至鄴，都軍俄大譟曰：「請令公帝河北石敬瑭。」康義誠勸進。嗣源乃令安重誨移檄會兵，軍勢大盛。嗣密據大梁，時從馬直都指麾使郭從謙不知。睦王存乂已死，欲奉之作亂。莊宗中流矢殂于絳霄殿廡下，善友歛廡下樂器覆莊尸焚之。及嗣源即位，拾莊宗骨石殯之。時年已六十矣。每夕宮中焚香告天，願早生聖人為生民主。在位八年，後為臣朱弘昭等殺之，葬徽陵。

閩鑄

先名延鈞，審知次子。初，延稟與鑄謀殺翰，稟推鑄立之。稟還建州，臨訣別云：「善繼先。」

志無煩老，兄重來至。長興二年，與鑄擊不勝，為鑄殺之。鑄好事鬼神，道士劉守元以左道

感之建寶皇后宮居
馬後帝為李倣殺之
改元天寶

丁亥

遼主德光名耀屈之

姓劉氏阿保機第二子
誕於大部落東牙

帳其時黑雲覆帳火光照耀有聲如雷
及長雄傑有大志精騎射平奚渤海二
國治廿一年於所居大部落建天雄寺
有契丹太祖像存焉大赦改元天顯

己丑

荆從誨

字遵聖興之長子立
二十一年壽五十八

庚寅改長興秦王李茂貞入朝去建國之制

楚希聲

字若訥殷次子判內外
諸軍事殷卒立之三年

楚希範

字子矩殷之第四子兄弟十人嫡
子希振最長仁賢其聲範同日而

壬辰

生聲母袁氏色美得寵而先立振棄官
為道士聲卒範立改年應順立十五年

壽四十九

孟知祥

是年封為蜀王

初令雕九經印板

馮道監造

旃檀瑞像自下二十一年復在江南

福州長慶惠稜禪師示寂杭之鹽官人姓孫氏幼歲稟
性淳淡年十三於蘇州通玄寺出家登戒歷叅禪肆唐
乾符五年入閩中謁西院訪靈雲尚有凝滯乃之雪峯
因問從上諸聖傳受一路請垂指示峯默然師設禮而

退峯莞爾而笑異日雪峯謂師曰我尋常向師僧道南山有一條鰲鼻蛇女諸人好看取對曰今日大有人喪身失命峯然之師入方丈叅雪峯曰是什麼師曰今日天晴好普請自此酬問未嘗爽於玄旨乃述頌曰萬象之中獨露身唯人自肯乃方親昔時謬向途中覓今日看如火裏冰師來往雪峯二十九載至天祐三年受泉州刺史王延彬請住招慶後閩帥請居長樂府之西院奏額曰長慶號超覺大師上堂良久謂衆曰還有人相

悉麼若不相悉欺謾兄弟去只今有什麼事莫要窒塞
也無復是誰家屋裏事不肯當荷更待何時若是利根
叅學不到這裏來還會麼如今有一般行脚人耳裏摠
滿也假饒收拾底還當諸人行脚事麼廣說具如傳燈
錄師兩處開法徒衆一千五百化行閩越二十七載後
唐長興三年壬辰五月十七日歸寂壽七十有九臘六
十

癸巳

吳越錢元瓘

字明寶錢鏐長子從父征伐
而有大功為羣臣請立九年

閔改龍啓

閔帝存厚

明宗第六子帝疾篤秦王從榮作亂孟漢瓊斬之十一月詔徵宋王存厚一名從厚入權

天雄軍府事帝殂祕喪六日羣臣自鄴迎之即位于
柩前甲午改元應順帝從朱弘昭等言徙潞王存珂
鎮河東王不受命命兵討之王慙衆而東帝奔魏州
至衛依刺史王弘贇潞王入謁太后命王即位廢閔
為鄂王遣弘贇子殿直繼往鵠帝帝不
飲繼繼殺之後追謚閔帝在位五月

甲午四月改清泰末帝存珂

明宗養子本鎮州平山人姓王氏家世微賤母曰魏

氏明宗為騎將過平山掠得有子阿三已年十餘歲
明養為己子號存珂長能騎射封潞王即位二年為
石敬瑭外結契丹主攻之帝舉
室自焚壽五十一在位二年

蜀孟知祥

字寶胤姓孟氏邢州龍岡人祖察秉昭義節旄父巖磁州刺史其母王氏夢日

月生於太原後事唐封為蜀王明宗崩祥乃立國號蜀改年明德立一年六月有疾遂付子昶

監國

是年二月功德司奏每年帝誕節諸州府奏薦僧尼欲

立講經科禪定科持念科文章議論科以試其能不

帝從奏

出繫年錄

乙未許王

明宗幼子為契丹立之不逾月王遇害

蜀昶

知祥第三子初名贊祥卒昶立不改號治三十一年

雷氏曰知祥後蜀二主四

石晉

姓石氏王金德
雷氏曰晉高敬
塘少帝丹主二姓三主一十一年

丙申改天福高祖敬塘

晉陽人父臬挾雞本出西夷自
朱耶歸唐從居山陰後隨克用

征伐有功官至洛州刺史生帝姓石不知因始明宗
變之以女妻之是為永寧公主為太原節度唐室既
亂末帝從敬塘鎮天平不行命兵討之石與桑維翰
劉知遠等假兵契丹光破唐兵緣先父事光因乃滅
唐築壇柳林即帝位改長興七年為天福元年十月
兵至帝自焚十一月敬塘入洛陽立八年崩壽五十
一葬新安陵

閻昶

鏐之長子名繼鵬既立奉道乃殺李
做改元通文立四年為延義子殺之

丁酉晉歲用金帛三十萬遺大遼

南唐昇

字正倫徐州人世本微賤父榮唐亂不知所終有姊出家為尼出入徐溫宅與

溫妻李氏同姓昇身長七尺為人溫厚減吳溥而立之年改昇元壽五十六據江南金陵

雷氏曰

李唐金陵主三九

戊戌

蜀

改年廣政

大遼

年改會同國號大遼

庚子

閩延曦

審知少子既立鑄大錢以一當十因出醉還連重過等使壯士馬上

殺之立四年改元永隆漢度民萬一千人為僧

辛丑

吳越王佐

字祐立權之子立七年壽二十

壬寅

南漢玢

初名洪度龔之子耀樞龜圖皆早死玢立二年改元光天後為道庠

陳思潮等殺之

癸卯

南漢晟

初名洪熙既殺玢自立封思潮等為功臣改元乾和立二十年酒太

過卒壽三十九

甲辰改開運少帝重貴

高祖猶子祖有六子皆亡帝父敬儒祖之兄也早卒高祖養帝

為子故得嗣位後三年為契丹主耶律德光長驅過河入汴攻之帝出降封負義侯送至黃龍府不知何

年卒在位三年

右晉二主凡十一年

而漢繼之

南唐璟

昇長子立二十四年改元保大壽六十四

是年舊唐史成劉煦撰授司空平章事

并載佛祖異迹

江南上元縣一民暴死三日復甦詣唐主具奏入冥見
先帝言為宋齊丘所悞殺和州降卒千餘人冤訴仗汝
歸語嗣君凡寺觀鳴鐘可延久其聲吾受苦唯聞鐘則
暫休或能為造一鐘尤善吾在位日嘗以于闐國遺我
玉天王像藏於瓦棺寺佛左膝人無知者汝以此為驗唐
主遂詣瓦棺寺佛膝得天王像感泣造一鐘於清涼寺
鐫其上曰薦烈祖考高皇帝脫幽出厄以玉像建塔葬

蔣山

出法苑

殷延政

亦審知子 曦 遣杜建崇舉兵攻政為政敗之乃

立建州政國號殷政年天德止三年
雷氏曰延政號殷建州三年

乙巳

契丹

怒帝不上表稱臣乃大舉兵入少帝迎於澶州

丙午正月遼主德光入晉不一年

獲民皆黥其面杜威李守真宗彥筠降於

契丹張彥澤斬關而入帝懼迎拜於門契丹不禮命左右執之彥澤傳遼主書與太后慰撫之降晉帝為

負義侯安置黃龍府即慕容氏和龍城也契丹御汴宮受朝賀以國舅瑪勒蕭翰留守汴以天時向暑發

大梁自白馬渡河盡驅百僚赴常山至藻城得疾至
然胡林卒國人剖其腹實鹽數斗載之北晉人謂之

紀帝

漢

姓劉氏王水德都汴
雷氏曰
漢祖知遠隱帝承祐二主四年

丁未高祖知遠後更名暉

其先沙陀部人移居太原帝生於晉陽業農威重後與敬

塘同侍明宗為偏將及立石晉于太原以帝為侍衛
親軍都虞候少帝進封太原王契丹臨京師少帝被
俘乃圖義舉二月即位於太原自稱漢王擁兵入
於汴殺許王與太妃兼晉二年春卒在位一年
乃

晉開運四年也

遼世宗立

諱阮小字烏裕太祖孫東丹王
托雲之子改元天祿治五年

楚希廣

字德丕範同母弟既立三
年後為兄募兵伐而縊

戊申改乾祐

吳越侖

璿子佐弟立一年為胡進思疑之廢囚于義和院迎俶立遷侖

東府

己酉隱帝承佑

高祖二弟曰崇曰信崇子曰贊皆仕官也高祖三子曰承訓承佑承勲嫡子訓

亡諸子尚幼以佑紹立信任倡優疎遠大臣時年十八時李業等伏甲於廣政殿因朝殺王章楊邠史弘肇又使人殺郭威於鄴威乃舉兵犯宮帝出城南趙村為伶人郭允明刺殺之壽二十就乾祐年號

吳越王俶

佐之弟字文德胡進思立之在位三十年

荆保融

字德長誨第三子立十年壽四十一歲

楚希萼

廣之兄殺廣而立明年隱帝崩京師大亂萼遂臣于李璟降封楚王以軍政事

任弟希崇崇亦臣璟使
邊鎬入楚遷馬氏于金陵

雲門文偃禪師示寂師姑蘇嘉興人姓張氏初叅睦州
蹤禪師州見來便閉却門師三扣門問誰師云某甲州
云作什麼師云已事未明乞師指示州才開門師拶入
州擒住云速道速道師擬議州托開云秦時轆轤鑽師
從此悟入州即指師見雪峯師至雪峯莊遇僧上山即
教之云汝到山頭見和上上堂衆才集便出握腕立地
云這老漢項上鐵枷何不脫却其僧如教致問峯下座

擄住云速道速道僧無對峯云適來不是你語僧云是
某甲語峯云侍者將繩棒來僧云某在莊上見一浙中
上座教來恁麼問峯云大眾去莊上迎取五百人善知
識來師上山才見雪峯便問因什麼得到與麼地師乃
低頭從此契合決擇久之遍訪諸方晚游廣中靈樹知
聖禪師久遲師來比至亦率眾門迎命居第一座樹將
終遺書囑廣主請師繼踵住持師上堂僧問如何是一
代時教師云對一說問如何是法眼師云普問如何是

諸佛出身處師云東山水上行問乞師指箇入路師云
喫粥喫飯問如何是透法身句師云北斗裏藏身問如
何是不掛唇吻一句師云合取狗口問如何轉動即得
不落階級曰南斗七北斗八師乃云眼睫橫亘十方眉
毛上透乾坤下透黃泉須彌山塞却你咽喉還有會處
麼若會得拽取占波國與新羅國關額又云盡乾坤一
時將來著女眼睫上你諸人聞恁麼道不敢望你出來
性燥把老僧打一摑且緩緩仔細看是有是無是个什

麼道理直饒向這裏明得若遇衲僧門下好槌脚折汝
若是個人聞說道什麼處有老宿出世便驀面唾汚我
耳目汝若不是个脚手才聞人舉便當荷得早落第二
機又曰直得觸目無滯達得名身句身一切法空山河
大地是名名亦不可得喚作三昧性海俱備猶是無風
匝匝之波直得忘知與覺覺即佛性矣喚作無事人更
須知有向上一竅在又曰彈指聲咳揚眉瞬目拈槌豎
拂或作圓相盡是撩鉤搭索佛法二字未曾道著道著

即撒屎撒屎又曰光不透脫有兩般病一切處不明面
前有物是一又透得一切法空隱隱似有個物相似亦
是光不透脫又法身亦有兩般病得到法身為法執不
忘已見猶存坐在法身邊是一直饒透得法身去放過
即不可子細檢點來有什麼氣息亦是病又曰直得乾
坤大地無纖毫過患猶是轉句不見一色始是半提直
得如此更須知有全提時節師居靈樹久之遷韶陽雲
門廣主屢請入內問法待以師禮往來學徒不下千人

臨終以表辭廣主垂戒學徒端坐而逝遺命塔全身於
方丈後一十七年至宋乾德三年雄武軍節度推官阮
紹莊夢師以拂子招之曰為吾寄語秀華宮使特進李
托奏請開塔吾久蔽塔中宜令暫出李得其語即以奏
聞尋有旨令韶州刺史同詣雲門開塔果見師真容如
生髭髮皆長李復上其事廣主迎真身赴闕留內庭供
養逾月送歸于塔謚大慈匡真宏明禪師有法嗣澄遠
焉

庚戌十一月

郭威兵至上為諸兵所殺

右漢二主四年

郭威篡之

周

姓郭氏王木德三都主汴

雷氏

曰周祖郭威世宗恭帝三主九年

辛亥太祖威更名廣

邢州堯山人父簡事晉為順州刺史帝少孤貧落魄無拘年十八有

權勇嘗殺屠者繫囚李繼韜惜其勇而縱之後漢祖命為樞密使隱帝聽李業譖遣供奉孟業齎密詔殺帝帝乃舉兵隱出宿七里寨衆潰隱回至玄化門劉銖在門上問隱左右兵馬何在因射左右隱回轡西北至趙村為伶人郭允明刺殺之帝迎劉昫子贊立之未至兵士馮道等擁帝而立太后廢贊為湘陰公以威監國受漢太后誥即位出漢宮器碎於庭詔曰自今紛華之物毋得入宮帝嘗屢戒晉王曰我死當衣以紙衣殮以瓦棺至甲寅正月卒在位三年

改元廣順

遼穆宗璟番名烏律

太宗長子是年九月世宗烏裕為燕王述軌等殺於

新州火神淀遂即位改元應歷至戊辰即宋太祖開寶元年九月為庖人弑于黑山下治年十八

東漢旻

姓劉氏漢祖母弟初名崇為太原守乾德四年立三年

世尊示滅一千九百年矣

壬子汝州寶應南院顯禪師示寂師系河北人嗣興化

獎禪師上堂示衆曰赤肉團上壁立千仞時有僧問赤

肉團上壁立千仞豈不是和上語師曰是其僧乃掀倒

禪床南院曰這瞎驢便棒又云諸方只具啐啄同時眼
不具啐啄同時用有僧便問如何是啐啄同時用云作
家不啐啄啐啄同時失僧云此猶未是某甲問處云汝問
處作麼生僧云失師乃打僧不肯後於雲門會下聞二
僧舉前因緣一僧云當時南院棒折那僧聞此語忽然
大悟方見南院答話處僧却回汝州省覲值師遷化乃
訪風穴穴認得便問上座是當時問南院啐啄同時話
底麼僧云是穴云會也未僧云會也穴云你當時作麼

欽定四庫全書

側補歷代通鑑
卷十七

五

生會僧云某甲當時如燈影中行相似穴云女會也

癸丑旃檀瑞像此下一百七十七年在汴京

九經印板
方成印行

之

甲寅世宗榮字茂先

太祖猶子本姓柴氏邢龍岡人太祖妻兄守禮之子後從姑養太祖

家遂命為子官至澶州節度使祖崩祕喪迎帝立於柩前威震夷夏廢諸寺宇年三十而崩葬慶陵治六

年改顯德

趙匡胤為
宿衛將

東漢承鈞

旻之次子去年旻崩遂立拜五臺山僧繼顯為鴻臚卿在位十三年不改

號

二月詔廢天下無勅額寺院凡三萬三百三十六所存者二千七百所廢銅像為錢時鎮州銅大悲像感應異常州之士民願以錢貸制不許及毀其背羣力皆墮腕而死遂傳其半制出家者必俟父母命郡國歲造僧帳凡死亡還俗者以時關落之僧帳自此始

通鑑

丙辰詔

禁大梁城行欽天歷

詔華山隱士陳搏入見問以飛升

黃白之術搏荅曰天子富有四海不應問遣還山

丁巳

東漢年改天會

戊午顯德五年七月十七清涼文益禪師示疾江南國
主親降候問越旬有五日沐浴辭衆端坐而逝停龕三
七顏貌如生公卿李建勛而下素服奉全身建塔謚曰
大法眼禪師餘杭人姓魯氏初究教乘傍探儒典游方
遇羅漢琛禪師頓明大事久之卓庵而居次歷江外至
臨川州牧請住崇壽開堂示衆曰諸人既盡在這裏山
僧不可無言與大眾舉一古人方便珍重便下座時有

僧出禮拜師曰好問著僧擬伸問師曰長老未開堂不
答話有僧自長慶來師舉先長慶偈問曰作麼生是萬
象之中獨露身僧舉一指師曰恁麼會又爭辨曰如和
尚尊意如何師曰喚什麼作萬象曰古人不撥萬象師
曰萬象之中獨露身說什麼撥不撥僧豁然大悟述偈
投誠自是諸方會下存知解者翕然而至始則行行如
也師微以激發皆漸而服膺海參之衆常不下千計上
堂大衆立久師乃謂曰只如便散去還有佛法也無試

說看若無又來這裏作麼若有大市裏人聚處亦有何須到這裏諸人各曾看還源觀百門義海華嚴論涅槃經諸多冊子阿那個教中有這箇時節若有試舉看莫是恁麼經裏有恁麼語是此時節麼有甚交涉所以微言滯於心首皆為緣慮之場實際居於目前翻為名相之境又作麼生得翻去若也翻去又作麼生得正去還會麼莫只恁麼念冊子有什麼用處未幾道行聞於江表金陵國主重師之道迎居報恩號淨惠禪師次遷清

涼朝夕開法諸方叢林咸仰風化致異域有慕其法者
涉遠而至嗣子德韶國師文遂江南國導師惠炬高麗
國師傳化焉師調機順物斥滯磨昏凡舉古德三昧或
呈解請益皆應病與藥隨根悟入者不可勝紀尋以韶
國師等化旺東南遂叛法眼宗旨

杭州永明寺道潛禪師河中府人也姓武氏初謁臨川
淨惠禪師一見異之便容入室一日淨惠問子於叅請
外明什麼經師曰華嚴經惠曰總別同異成壞是何門

攝屬師曰文在十地品中據理則世出世間一切法皆具六相惠曰空還具六相也無師懵然無對惠曰子却問吾師乃問空還具六相也無淨惠曰空師於是開悟踊躍禮謝曰子作麼生會師曰空淨惠然之異日因四衆士女入院淨惠問師曰律中道隔壁聞釵釧聲即名破戒見覩金銀合雜朱紫駢闐是破戒不是破戒師曰好个入路惠曰子向後有五百毳徒而為王侯所重在師尋禮謝辭駐錫於衢州古寺閱大藏經而已忠懿王

命入府受菩薩戒署慈化定惠禪師建大伽藍號惠日
永明請居之師曰欲請塔下羅漢銅像過新寺供養王
曰善予昨夢十六尊者乞隨師入寺何昭應之若是仍
於師號加應真二字師坐永明大道場常五百衆師上
堂曰佛法顯然因什麼却不會去諸上座欲問佛法但
問取張三李四欲會世法則叅取古佛叢林無事久立
僧問至道無難借言顯道如何是顯道之言師曰切忌
揀擇問如何是惠日祥光師曰此去報慈不遠曰恁麼

則親蒙照燭也師曰且喜沒交涉

戊午春帝欲濟江南唐璟大懼遣兵部陳覺非奉表割

江北十四州地用周正朔而降

荆保勗

字省躬誨之第十子在位四年壽五十九矣

己未 趙太祖匡胤

連年征討有功授歸德節度使殿前都點檢


六月世宗北伐病背癰糜潰而崩於道

恭帝崇訓世宗第四子七歲即位命宋太祖趙匡胤討

河東軍情忽變有飛語云不如扶點檢為天子遂立

宋祖降封帝為鄭王立不一年

右周三主凡十一年



佛祖歷代通載卷十七